

ի մայրաքաղաքն Փրանկիոյ, ի մեծանուն և ի ճարտարարուեստ Բէցդըման ուսս նկարչէ. որոյ գործ է և խաչելութեան պատկերն՝ կախուած ընդ մէջ երկու խորանաց, աւագին և սրբոյ Պատուապետն խորանաց:

Եկեղեցւոյս առաջին ժողովրդապետն եղած է՝ ոմն Օգոստինոս քահանայ Ճէննաոի, գենուացի, ազգաւ իտալացի: Ինք եղած է, ինչպէս կը վկայէ ի կռան արձանագրութեանց մատենին եկեղեցւոյ, հիմնադիր Օտեսսայի կաթողիկաց եկեղեցւոյն. և ապա առաջին ժողովրդապետ ի Թէսզոսիա յամի 1807 ի 24 նոյեմբերի. և շարունակեր է ի նոյն պաշտաման մինչ ի վերջ 1819 տարւոյն. Սիմֆէրոպոլի քաղաքի ժողովրդապետի անուամբ ալ յիշատակուած և արձանագրուած կը գտնենք զինքը: Նոյն ատենէ մնացած եկեղեցական մատենից մէջ՝ Ճէննաոի քահանայէն ետքը՝ երկու կաթողիկ հայազգի քահանայից անուանք ալ կը յիշուին. և են տէր Գրիգոր Կոսիկեան և տէր Սահակ Յովնանեան որ ի յատուկ ստորագրութեանն կ'անուանէ զինք ժողովրդապետ եկեղեցւոյն Եւպատորիոյ (Կէօզլէվ). կայ և Խաչատուր կանոնիկոս վարդապետ մը Տուհայեան՝ ժողովրդապետ եկեղեցւոյն Խարասուի:

1819 ին առաջին անգամ մուտ գտած է Թէոզոսիոյ եկեղեցւոյն արձանագրութեանց մէջ՝ հայ լեզուն. որ և այսպիսի սկզբնաւորութիւն ունի. « Եւ Հ. Պօղոս Տէրվիչեան՝ քահանայ եկեղեցւոյս Կաֆայի ուղղափառաց » և այլն: Ինքն էր յուխտէ Վնտոնեան հարց որ ի Լիբանան, և ժողովրդապետական պաշտօնը կատարած է մինչ ի 1826: Հետեակ տարիէն կը սկսուին արձանագրութիւնքն